

Galakan Bertani

Daripada Anas bin Malik RA, Rasulullah SAW bersabda:

مَا مِنْ مُسْلِمٍ يَزْرَعُ زَرْعًا، أَوْ يَغْرِسُ غَرْسًا، فَيَأْكُلُ مِنْهُ طَيْرٌ أَوْ إِنْسَانٌ أَوْ بَيْهِيمَةٌ إِلَّا كَانَ لَهُ بِهِ صَدَقَةٌ

Maksudnya: "Mana-mana orang Islam yang bercucuk tanam kemudian dimakan daripadanya burung, manusia atau binatang kecuali baginya sebagai sedekah."

Riwayat al-Bukhari dalam *al-Sahih* (5/5) no. (2320)
dan Muslim dalam *sahih* (3/1189) no. (1553)

Pedoman dan Iktibar Hadis

Antaranya:

1. Al-Syahid Hasan al-Banna berkata: Islam menggalakkan manusia bekerja dan mencari rezeki. Malah Islam menetapkan, orang yang berkemampuan wajib bekerja. Islam amat memuji pekerja-pekerja yang mahir lagi profesional. Islam juga mengharamkan manusia meminta-minta. Islam menjelaskan bahawa ibadat yang terbaik ialah bekerja. Berkerja adalah sunnah para Nabi.
2. Hasil usaha yang terbaik adalah hasil usaha tangan sendiri. Islam mengecam mereka yang menganggur. Islam mengecam mereka yang menjadi beban kepada masyarakat walau apa sekalipun alasan untuk mereka menganggur. Walaupun kerana mereka mahu memberi tumpuan kepada ibadat, Islam tidak pernah mengenal erti pengangguran sebegini.

3. Bertawakal kepada Allah SWT adalah dengan cara melakukan sesuatu dan yang boleh mendatangkan hasil. Jika salah satu perkara ini tidak dilakukan ia bukanlah tawakal. Rezeki yang ditentukan ini dikaitkan dengan usaha yang berterusan.
4. Pelbagai dasar baru negara turut diwujudkan dan diperkenalkan semata-mata bagi merealisasikan hasrat dan komitmen kerajaan menjadikan industri pertanian sebagai industri yang dinamik dan berdaya maju sehingga mampu menjadi mengeksport bahan makanan dan produk pertanian ke pasaran global pada masa akan datang. Antara dasar-dasar tersebut ialah Dasar Bioteknologi Negara, Dasar Biofuel Nasional, Dasar Wawasan Negara (2001-2010) dan Dasar Pertanian Negara Ke-3 (1998-2010). Penglibatan aktif dan tindakan bersepadu oleh seluruh jentera kerajaan pastinya menjadi pemangkin kepada pembangunan agresif sektor pertanian. Ini secara tidak langsung meletakkan industri pertanian berada pada landasan yang betul sebagai teras pertumbuhan ekonomi negara berpandukan potensi dan prospek masa depannya yang cerah.
5. Sungguhpun demikian, industri pertanian tetap menghadapi pelbagai cabaran dan halangan sebelum ia benar-benar berjaya membawa dimensi baru kepada pembangunan ekonomi dan sumber utama hasil negara. Cabaran yang paling utama ialah mengubah persepsi dan minda masyarakat. Imej sektor pertanian yang selama ini sinonim dengan kemiskinan dan kemunduran perlu dikikis dan diperbetulkan.
6. Kongkongan dan hambatan persepsi negatif menyebabkan sektor pertanian kurang menjadi pilihan khususnya di kalangan generasi muda yang merupakan barisan pelapis negara pada masa depan. Namun, melalui usaha yang bersepadu dan berterusan yang kini sedang rancak dijalankan maka dijangka persepsi tersebut akan berjaya diatasi sekalipun memakan masa dan tenaga yang bukan sedikit.



Mutiara Hikmah

- ❖ **Pujangga berkata:** Jadilah seperti burung yang rezekinya datang pada setiap pagi dan petang, tidak pernah dipusingkan oleh hari esok, tidak pernah percaya kepada sesiapa pun, tidak pernah menyakiti siapa pun, bayangnya ringan dan gerakannya indah.

- ❖ **Pujangga berkata:** jangan lupakan *حَسْبُنَا اللَّهُ وَنِعْمَ الْوَكِيلُ*, sebab ucapan ini dapat memadamkan api yang membakar, menyelamatkan orang yang tenggelam, menegaskan jalan yang dilalui dan mengandungi janji yang kuat.

Kisah Teladan

Sekarang marilah kita melihat kehidupan salah seorang insan yang mulia dan agung, iaitu Ali bin Abi Talib bersama isterinya, Fatimah binti Rasulullah SAW. Pada suatu hari, kerana tidak ada sedikit pun makanan yang tersedia di rumah, Ali keluar dari rumahnya untuk mencari makanan. Dia keluar dengan mengenakan pakaian yang berlapis bulu binatang, kerana cuaca ketika itu sangat sejuk. Ia berjalan menyusuri pinggiran kota Madinah. Setelah sekian lama berjalan, dia teringat seorang Yahudi yang mempunyai kebun, dan segera menemuinya di kebun tersebut.

Setibanya di sana, Ali mengutarakan tujuan kedatangannya kepada orang Yahudi tersebut. Maka berkata orang Yahudi itu kepadanya: Kalau begitu, bantulah kami terlebih dahulu mengambil air dari sumur. Setiap satu baldi yang dapat kamu ambilkan akan aku beri upah sebiji kurma. Ali pun sanggup menerimanya lalu mulalah dia dengan kerja tersebut. Cukup lama dia bekerja sehingga tangannya meleceh dan bengkak, dan tubuhnya menjadi sangat lemah. Setelah itu, orang Yahudi tersebut memberinya upah dengan beberapa kurma. Maka pulanglah Ali dengan perasaan senang. Di tengah jalan, Ali bertemu Rasulullah SAW, lalu membahagikan sebahagian kurma tersebut kepada beliau. Bakinya, dia membawa pulang untuk dimakan bersama Fatimah.

Inilah salah satu dari realiti kehidupan sahabat Nabi. Namun, mereka merasakan bahawa rumah mereka dipenuhi dengan kebahagiaan, ketenangan, ketenteraman dan cahaya kerelaan atas apa yang mereka perolehi.

Prinsip-prinsip luhur yang diajarkan oleh Rasulullah SAW kepada Para sahabat begitu tertanam di dalam hati mereka. Mereka hidup dalam *idealisme* yang tinggi. Mereka bertindak sesuai dengan gerak hati dan jiwa yang suci, sehingga mereka dapat mengetahui mana yang benar dan mana yang tidak, mana yang harus diamalkan dan mana yang harus dijauhi. Mereka juga mengetahui inti persoalan yang ada dan apa sahaja yang ada di sebalik persoalan tersebut.